

Killian Cafougnette

1989 rue Staline

02400 Essomes-sur-Marne

Bonjour à tertoutte et à tertousse, et granmint d'amitchiés resectueusses à ch' Directeur ed' l'Agince d' el région pour el lanque picarte, tout cha d' la part ed' mi, Killian Cafougnette, et d' mon mon-onc' Kléber Cafougnette.

J'écris cheull' lett' et j' raconte el' conte pour mi gagner tros chints euros, pour mi passer min permis moto.

À ch'bout du bout d' min mot d' billet, j'ai épiulé min ARIB (AR'levé d'Idintité Bancaire) pour ti z'ott' m'invoyer ché sous d'el premier prix.

J'ai mieux querre que vous réponse all' arrif' à cheull Caisse d'Éparne ed' l'Écureull à Quentin, putôt à m' maison, rue Staline, à Essomes-sur-Marne.

Ch'est mon mon-onc' Kléber qui m'a donné ché bons conseils : «Asteur, te dos êtt' politiqu'mint corrèque ! Mettons qu' té resses : 11 rue Chainte Cécile à Chaint-Quentin, teu dis qu' té resses rue Cécile, à Quentin.» Pass' que, dins leur tchiête, à ché journalisses d'el télévision, tous chés culs-bénis et chés garnouilles ed' bénitchier, ch'est des pédésexuels... Alors, teu fais attintion ! J'y ai répondu que mi, j' restos rue Staline, et que cha, il le savot. «Bin, ch'est pas tell'mint mieux, qui m'a dit. I n'a qui r'gartent à chés détals. Staline, y a organisé des famines. Ch'est tout d' même pas politiqu'mint corrèque ! In y busiant, politiqu'mint, ch'est même du brin qu'y a fait. Teu s'ros mieux à dire que teu resses rue Lénine, mais tin courrier et pis t' dringuelle pou ch' premier prix d' littérature in picard, i n'arriv'ront'te pon à l' maison, y a pas d'avance», qu'i a dit mon mon-onc'.

Alors, in m' ramintuvant de m' première année d' BTS «Markieting Éco-Responsap'» à cheull' Cirté Scolaire Gagarine, j' vous invos ichi deux-tros feull's ed' cacoules pour ech' concours. Abile que l'arvinds min vélo pour mi aller à min nouviau lycée su' m' moto !

C'mint et pourquoi Killian Cafougnette, el' garchon à Roger Cafougnette, sin fîu à l'illust' Zeph Cafougnette, ac' es' n' épouse Veronique, i s'a fait dessaquier par sin père ed' l'école laïque...
Eun' histoere pikareske in picard, qu'alle est politiqu'mint corrèque, grâce à son mon-onc' Kleber Cafougnette.

Cha qu'y est écrit in caractères gras, juss' pad' zeure, ch'est ch' titt'.

Mon mon-onc' Kléber i m'a dit qu'i fallot marquer «Pikarèsk» dins l' titt', pasque tout y s' passe in Picardie et comme cha m'n hitoère all' s'ra célèp' avec un personnache célèp' et granmint d' droits d'auteur.

«Té vos, qui a fait, Manon Lescaut, ch'est un roman qu'y a été écrit in Picardie, et ousque cheull' femm', Manon, alle est Pikarèsk. Eh ben, v'là ichi un liff' qu'y a été racaté pour faire eun' comédie musicale : prinds-z-in d'eul' graine, maloutte !»

Cha m'étonn'rot que mes comarates d'école, Johnny Branqu' ed' Thym et Raoul Catouillard, cha les intéresse, mais à m' mote que Kimberley et Jessica all's auront querre ed juer dins eun' comédie musicale : Pivoine, sa sœur jumelle à Jessica, après qu'alle a eu sin Bac Pro in Management / Communication, alle a té à chés écoles ed' Lille, pour faire eun' licence des mètchiers du spectac'. Alle a suivi tous ches cours d'expression corporelle, alle a jamais eu sin diplôme, mais asteur alle dans toute nute dins ch' Cabaret Discount de Dodo la Saumure à Tournai.

Jessica, alle est restée ac Kimberley, Branqu' ed' Thym, Catouillard, Enzo, Mouloud et pis mi à l' Cité Scolaire Gagarine. In peut dire tout qu'est-ce qu'on veut su' ch' Directeur Bistouquette, mais l' Bac pro, tout l' monte y l'a eu, ch' t'année-là, même cheux-lalle qui savottent compter seul'mint avec eun' calculette ou cheusse qui féjottent queuette tout l' temps !

Ch'est cha qui m'embête un peu qu' min père i veut m' dessaquier d'ech' Cité Scolaire à Bistouquette : ch'est vrai qu'y est jamais à sin bureau, vu qu'y est toudis in route à faire el' biau d'avant chés garénelles, mais t'in connos, ti z'ott', eun' aut' école comme cha ?

Mon mon-onc' Kléber y a découpé l'artic' dins cheull' gazette UNSUD Éducation :

Lycée Garagrine : halte à la stigmatisation / une modélisation exemplative

Dans le cadre d'un plan pluriannuel de discrimination positive, objectif 105 pour 100 de réussite au BTS, avec intégration adaptée dans l'ensemble des Masters de l'Université, sur Validation des Acquis de l'Expérience.

Ch'est li qui m'a espliqué qu' ch'étot vraitmint eun' bonn' since pour tous cheuss qui voulottent faire des Hautes Éteutt's même que cha s'rot des inchnpés, d' zébeuhés, des niques ed' doulles

ou des mitans d' sots ; «J'arconnos que je n' comprends mi c'mint vous s'rez 105 pour 100 à décrocher vou BTS, vu qu'y a fauque 14 inscrits dins cheull' section, à mon Gagarine. Pour mi, el' seule imbroull' qu'alle pourrot s' présinter, ch'est quand qu' teu devras faire vire tin CV à ches gins pour ti rintrer dins un Master et pis v'nir Directeur ou bin Cosmonaute.» I a busié dins s' tchiête, et i a fait : «I faut rester politiqu'moint correc'. Sur tin CV, duss que ch'est marqué :

Établissement et section d'origine

teu vas écrire :

Cité Scolaire Publique, Brevet de Technicien Supérieur,
Marketing Éco-Responsable - Académie des Hauts de France

Et si on t' pose des questchions, teu peux dire ek t'as toudis eu querre juer ac des avions in papier ou bien intiquer de l' pourette explosif' dins des fusées in carton quand ch'est bétôt Carnaval, mais n' va pas chi raconter qu' teu viens d' l'École Gagarine.»

Chés imbroulles all's ont c'minché quand j'ai té dire à min père qu'in s'étot camuché pad' zou ches tapes dins l' salle ed' classe, in freumant chés rideaux, in soufflant chés leumières et in barrant chés portes. Pour un cop qu'i m' demindot cha qu' j'avos fait à l'école, y'a fallu qu' cha queuche el' soir du jour que Bistouquette y avot prévu «un entraînement anti-intrusion dans l'enceinte de l'établissement» !

«Et combien d' temps qu' cha a duré, ch' jus-là ?», qu'i a dit min père, tout in fougèle. «Et qui ch'est cheull' jonn' fill' qu'alle étot enceinte ?» In a resté ajouqué su' l' denne pindant ein' gross' demi-heure, et après in a dû arrêter à causs' ed' chés fouteux d' brin, et pasque Kimberley alle est homophope : all n'aurot pas su tenir plus longtims dins l' noir, dins ein' pièche qu'alle restot freumée.

- «Et ti, t'as pas fait tin agozill' ?

- J'ai mis ein' tart' su' s' guiff' à Catouillard, vu qu'y avot passé sin temps à péter dins nou narines. Et pis j'avos d' mô à mes glaouïs, pass' que j' m'avos fait tâter les prônnes.

- Et ch' maît', i n'a rien dit ? Qui ch'est qui t'avot fait cha ?

- Ch' maît' y est allé pour faire un rapport à ch' directeur et, pour ein' fos qu' Bistouquette y étot à son poss', y s'avot aussi intiqué sous ch' bureau, avec Jehanne Déprime, cjeull' proviseure adjointe !...

- Et mi, j'avos d' mô, et je n' sais toudis pon si ch'est Johnny Branqu' ed' Thym ou bin Jessica qui z'ont joué ac mes deux boules...

- Acoute me chi, garchon : dins l'famill' Cafougnette, in n' va pas souvint à l' messe, mais in a de l' moralité.

Si t'es appris comme cha, à mon d' l'École Laïque,
Cros-me, in va t'inscrire dins l' circuit catholique :
Même si cha nous fait quier, pass' qu'in dévra payer,
Nous, in veut qu' nous infants y seuchent bien éduqués.»

Conclusion(s) :

- Mi, cha m'a saoulé, déjà pass' que min père, sans l' faire d'exprès, y s'a mis à parler in viers. Et cha, mon mon-onc' Kléber, y m'a dit qu' cha n'étot pon admis dins ch' règlement du concours pour mi ganer tros chints euros ! Mais tout cha qu'y est dins m'n' histoère, ch'est fauque el' vérité ; jé n' sauros pon la trafiquer. Donc, i faut m'escuser pou ché viers.

- Cha m'a imbêté, aussi, qu'i m' dessaque d'em' n'école pass' qu' asteur j' vas vrainmint devoir em' mette au travail' pour mi avoir min BTS. In arvénant à Jessica, Mouloud, Enzo, Kimberley et même Catouillard, si y' arrêtot d' péter, in va s'arteuver ! In a rendez-vous Mercredi des Chind'es au Carnaval ed' Dunkerque, à mon Branqu' ed' Thym, pour faire chapelle.

- Cha qui m' rassure, ch'est s' promotion à Bistouquette : y a té nommé personnell'mint par el' Miniss' «Directeur au Centre Régional Inter-Départemental Pédagogique Saint-Exupéry» Ch'est justemint là qu' min père y m'avot inscrit... Même qu'y a été surpris su' l' cop, vu qu'à mon Saint-&Exupéry, ch'étot... gratuit !